

regni comitia indixisset, duo in Angliam præcipui catholici, Thomas Percius, ac Robertus Catisbejus, acerrimo in Jacobum odio ob religionem incensi, de nece ei inferenda consilia ineunt. Percius vi & ferro agendum censebat; Catisbejus infidiis tentandum arbitrabatur. Silentium jurejurando pacti, alte pectori conditum consilium Catisbejus Percio promittit; aulæ comitiis destinatæ subjectum fornicem tormentario pulvere, sulphure, farmentis complendum esse: furtim igne admoto, prompte pabulo incrementa suscipiente, momento ingenti vi disiectum atque eversum, Regem, conjugem, filios & proceres simul oppressurum. Catisbeji astus Percio probatur; conceptum scelus aggrediuntur, subterraneum locum conducunt, tamquam in illum dolia atque res hujusmodi conjecturi. Inde sensim secreto stramentis pyrioque pulvere fornicem stipant: diem ad scelus patrandum constituunt. Viginti aureorum millia, si res voto succedat, impendenda cogunt; equos expeditos, quibus gestum in omnes regni partes proferatur, instruunt. An externos Principes, communicatis consiliis, ad opem ferendam invitent, ambigunt: ne impedimenta objiciantur veriti, facinus perfici satius existimant, confecto adjuutores ac patrocinatores non defuturos. Consilium, alioqui tectum, densaque caligine involutum, divinitus insperato, antequam patrandi sceleris dies adsit, evulgatur. Forte Montilaqueo nobili cuidam, veteri religioni addicto, ut comitiis cum reliquis adesset, dies dicta erat; & quem summo amore prosequeretur Percius. Imminens fatum miseratus, per Hibernum quemdam epistolam absque nomine mittit: ne præstituta die comitiis intersit, si se salvum velit, monet; ingens si accesserit periculum subitum; perlectam epistolam statim flammis donet; ambusta periculum omne depulsum iri. Literas insani hominis esse, quamvis sibi Montilaqueus suadeat, attamen cum de summi momenti re ageretur, statim ad Salisberiensem comitem, primas apud Regem obtinentem, defert. Perlectas, licet Salisberienensis non magni æstimaret, Regi tamen ostendit. Hæret ille, ingens flagitium iis significari ratus; sedulo rimatur, expendit verba, quæ periculum ita cito discussum iri, ac literæ comburantur, affirmant, examinat, pensitat. De cuniculo incendendo, quo publicæ comitorum ædes momento excendantur, atque

1605
Conjuratio
contra Ja-
cobum An-
glia Regem
acta.